

Betg dapertut uschè patgific sco en il Grischun

Las elecziuns per il cussegl dals stans en differents chantuns

DA CLAUDIA CADRUVI / ANR

■ **Stefan Engler e Martin Schmid han bella vita. Els èn quasi reelegids. Ater vesi or en chantuns sco Turitg u Son Gagl. Là battan ins fin ils 18 d'october cun bandaschas diras per ils sezs desiderads en la chombra pitschna.** I na dat nagin che ha mustgas da far in zichel sguzia ad Engler e Schmid. Ils dus candidats grischuns per il cussegl dals chantuns sesan segir en sella. Teoreticamain fissi bain pussaivel ch'insatgi sa preschenta anc sco cuntercandidat. Ma las elecziuns dals ultims onns han mussà: En il Grischun n'èsi nungrazia pussaivel da stuschar in veder ord l'uffizi.

En auters chantuns marscha dapli. A Neuchâtel pon ins perfin discurren d'ina inflaziun da candidts: Là sa mettan 18

persunas a disposiziun per la chombra pitschna.

AG – Philipp Müller fa da pauper

Otg partidas battan en l'Argovia per ils dus sezs. *Pascale Bruderer* (ps) sco vedra ha ina posiziun ferma. Per defender il sez da *Christine Egerszegi* che banduna la chombra pitschna ha la pld miss si *Philipp Müller*. Il president da la pld desista pervi da ses accident da l'emna passada da manar in cumbat. «Ord respect visavi la dunna giuvna» ch'el haja blessà grevamente na prendia el betg pli part a discussiuns da podi, scriva el en ina comunicaziun.

Verdaivel na tuna gliez betg. Intervistas dat Müller tuttina, sco ier en l'«Aargauerzeitung» sut il titel «Der schlimmste Tag in meinem Leben». I tuna macaber: L'attenziun che Müller survegn en-

tras la tragedia promovava forsia anc sias schanzas. Fin uss n'ha el gea betg ditg ch'el desistia sch'el vegnia elegì.

Privlus per Müller pudess daventar *Hansjörg Knecht* (pps). Avant quatter onns ha el recaltgà 64 490 vuschs sco cusseglier naziunal, Müller mo 57 281 vuschs. Uschiglio candideschan anc *Ruth Humbel* (pcd), *Beat Flach* (pvl), *Bernhard Guhl* (pbd), *Irène Kälin* (verda) e *Lilian Studer* (evp).

VS – dominanza da la pcd periclitada

Dapi 140 onns domineschan la pcd e pcs ed occupeschan omadus sezs vallesans. Tenor ina lescha nunschritta survegn il Vallais sut in sez: Là candidescha *Jean René Fournier* puspè. Il Vallais sura ha «da bun» il segund sez. La pcd e la pcs sa barrantan giu en il Vallais sura.

Sco successur da *René Imoberdorf* (pcs) propona la pcd *Beat Rieder*. L'omnipotenza da las partidas cristianas pudess quest onn dentant vegnir rutta: L'anteriur cusseglier guvernativ *Thomas Burgener* (ps) candidescha. El è popular e posseda bunas schanzas. *Pierre-Alain Grichting* (pld) e *Franz Ruppen* (pps) van er en il cumbat.

SG – Privel per Rechsteiner?

Ils dus veders *Paul Rechsteiner* (ps) e *Karin Keller Sutter* (pld) candideschan puspè. Tuttina datti a Son Gagl concorrenza seriosa. La pcd n'ha betg magunà ch'ella ha stuì ceder avant quatter onns ses sez ad in sanester. Cun *Thomas Ammann* vul la partida reconquistar il sez ch'ella aveva occupà bunamain tschient onns.

Ma Ammann n'è betg in candidat da num e pum. Ils propi buns politichers da la partida na crain para betg da savair

stumplar Rechsteiner ord l'uffizi. Il socialdemocrat che ha adina battì per ina ferma AVS raccoglie renconuschientscha en ses chantun ch'è uschiglio stget conservativ u liberal.

Privlusas per Rechsteiner pudessan daventar las candidaturas da las cusseglieras naziunales *Margrit Kessler* (pvl) ed *Yvonne Gilli* (verda) che maglian vuschs da simpatisants da la sanestra. Plinvant candideschan *Richard Ammann* (pbd) e *Hans Oppliger* (evp).

ZH – Tschintg prominents

Gronda tensiun regia a Turitg nua ch'ils sezs da *Verena Diener* (pvl) e *Felix Gutzwiller* (pld) vegnan libers. Tuttas partidas han mess si candidats da vaglia. Cusseglier naziunal *Ruedi Noser* (pld) ha bunas cartas da tegnair il sez per sia partida. E cusseglier naziunal *Daniel Jositsch* (ps)

pudess reconquistar il sez ch'ils sanesters han surlaschà a Diener per impedir che la pps conquista cun *Christoph Blocher* u *Ueli Maurer* in sez en la chombra pitschna.

In candidat ferm è er il professor da dretg *Hans-Ueli Vogt* che la pps ha miss si per omaduas chombras. Vogt è il bab da l'iniziativa «Dretg svizzer empè da der-schaders esters» ed el è medemamain in collega da lavur da Jositsch. Omadus èn engaschads sco professers per giurisprudenza a l'Universitad da Turitg.

Schizunt las partidas cun main buns aspects tramettan politichers prominents en il cumbat. Ils verd-liberals han miss si il president da partida *Martin Bäuml*. Ils verds vegnan cun *Bastien Girod*, *Barbara Schmid-Federer* (pcd) e *Maja Ingold* (evp) candideschan plitost per vegnir pli enconuscentas.



Collegas e concurrents: Daniel Jositsch (ps) e Hans-Ueli Vogt (pps) lavuran omadus a l'Universitad da Turitg sco professers da dretg.



Sco vedra è Pascale Bruderer en ina posiziun ferma. Era Philipp Müller resta favorit – malgrà ses accident.